

湘军志

相

連

出

十

大

篇

宣統元年己酉

冬重刊于東洲

重刻湘軍志跋

是篇爲湘潭王湘綺先生所著初浸板於川蜀原印不
過數十本衡陽唯程常有藏書不輕得見坊間翻刻錯
譌爲多讀者艱之同學屢謀重刊皆爲先生所阻止蓋
是書初出曾伯見之若有不釋然者故先生絕口不言
然海外流傳已數萬本非僅欽其文章經濟足備一朝
掌故其於將才之賢否軍謀之得失與夫始終艱難勝
敗之數莫不言之親切無所忌諱實中國近今之信史
也顧蒙讀盾鼻餘瀋載大浦之役劉軍由間道取道會
甯上杭獨先期至相與畫合圍之策敗賊塔子畧殪逆

渠汪海洋與志言典軍未陣而敗者不合間舉所疑質之先生先生喟然曰吁左文襄之送克菴南歸養親也敷張勳烈以爲閩里光寵故夸大其詞吾聞于鄧寶之親歷行陣不可易也又松潘之役志言周達武所部八千人驚幾潰莫測所由及讀甯鄉廖先生蓀咳所輯武軍紀略言軍中懸釜待爨朝夕不保用羅公亨奎計會全部所齎糗尙支半月各軍勻濟檄近屬供軍不十日糗芻填委軍之免於譁潰者一問耳得此二者參觀互證然後知曾侯之隘左侯之夸而儒素之相契自有真也庶幾問一得三者乎旣重刻斯編使與詩文箋啟同

式用敢敬述所聞以告後之讀是篇者

宣統元年己酉冬十月衡陽弟子喻善謹跋

湖南防守篇第一

湘軍志一

自古言軍勢者多侈言形勝要害積彊弱之故然其實非也項羽繆言郴爲天下上游湖南自郡縣以來曾未嘗先天下 國朝移行省於長沙復漢國制控扼十六大城以防苗故鎮筸頗有精兵出征四方至其財賦全盛時才敵蘇松一大縣院司之選在直省下等咸豐初元巨寇洪秀全自全州出永郴圍省城掠舟洞庭遂連破名省天下莫能當 文宗憂之詔湖南治團練善後以鄉人副巡撫湘軍始萌芽矣方圍城時官吏倉皇治軍劣愈於武昌安慶其後湘軍日彊巡撫亦日發舒體

日益尊至庭見提鎮易置兩司兵餉皆自專湘軍則南至交趾北及承德東循潮汀乃渡海開臺彎西極天山玉門大理永昌遂度烏孫水屬長江五千里擊櫟聞於海自書契以來湖南兵威之盛未有過此者也無他故專滅洪寇之功耳然而洪寇之盛則亦由湖南始始合圍而縱之後起偏師追而殲之豈天數邪一二人謀力之所致也道光三十年五月庚戌廣西亂始上聞其時慶遠平樂潯州在在劫掠而名者陳亞貴廣東英德盜掠浛光戕守備走懷集湖南始戒嚴駱秉章爲巡撫九月詔徵鎮筸兵二千詣梧州從兩廣總督進征起李

星沉於長沙授欽差大臣專赴廣西又命秉章出境

防勦秉章奏省城居中宜鎮定且飭邊吏屯戍十二月
陳亞貴平乃討金田金田村者潯州倚郭桂平縣地前
史所稱大藤峽也其西則武宣貴縣土客民自來襍居
相讎姦民楊秀清利客豪資說令求土民女爲妾又自
至土家激撓之因勸豪劫女使相攻燒眾無所歸秀清
則悉劫之以叛有眾數千惡自倡亂乃投金田合於洪
秀全自明末西夷人以數算新法詫中國因得布其祇
教愚民傳奉世代秘守婦女尤惑之秀全亦假以招誘
懼官吏訛索遂拒險屯結秀清至自言通天語秀全當

爲天兄咸豐元年僭號天王出掠旁縣廣西巡撫周天爵提督向榮將萬人并前發諸軍四千餘人圍之大黃江星沅天爵不相下奏請統帥大學士塞尙阿帥二都統將四千五百人駐湖南爲聲援四月 詔塞尙阿代星沅星沅薨寇自武宣潰圍東北走象州秉章奏言湖南防兵四千餘前 詔提督余萬清出境會攻力不足命總督程矞采行邊六月寇還武宣八月潰圍大破巴清德軍東走藤北犯永安陷之余萬清母喪解官畱營九月鮑起豹爲提督屯江華二年二月永安寇潰圍直北趨陽朔四總兵敗死遂圍廣西省城余萬清將千

人往援屯北門三月郴盜劫餉銀殺知州胡禮箴四月
寇解廣西省城圍東北陷興安全州撤七千人追之以
和春將壬寅寇入湖南境將趣永州阻水退走道州余
萬清先還守道州城總督駐衡州聞寇遽乘舟北走萬
清亦棄城不守乙巳道州陷巡撫委事總督總督聞永
州寇退復還衡州六月庚辰朔塞尙阿移駐永州合兵
二萬餘人圍寇道州檄鮑起豹還長沙丁亥寇分陷江
華殺知縣劉興桓壬辰陷永明丁未陷嘉禾戊申陷藍
山七月己酉朔陷桂陽州知州李啓詔走死庚戌陷郴
州殺知州孫恩保 詔罷駱秉章逮治余萬清以羅繞

典治軍長沙料兵唯二千餘人練勇三千餘人巡撫張亮基未至總督程喬采託衡防不來秉章繞典方議築土城禁譎言未能謀兵事也寇旣陷郴疑所往己未走永興殺知縣溫德宣分黨踞之大軍悉移永興蕭朝貴者以膽譎自奮謂羣寇遲悞獨率千餘黨謀襲長沙繞山道東北行百九十里掠安仁丙寅陷之北犯攸丁卯陷之遂過醴陵丙子至省城南十里止城中料寇當從耒衡正道來民走報寇至怒其無公文執將斬之石馬鋪屯將尹培立以潼關副將率陝西軍千人倉卒拒戰陝軍不慣稻食所屯地無麩皆買之城軍未朝食相

持一時許皆潰散培立死之於是潰軍或走城中巡撫方巡城乃遽還塞南門然猶不知何軍潰敗城外居民亦不知寇已至蕭朝貴設幕城南有楊生者誤以爲達官上謁獻策朝貴領之俄而寇將至怪問何人朝貴曰此楊先生條程事者生覺蒲伏幕後踰山走而寇望城東南隅高樓以爲城樓趨之則非門返而南門塞城中乘城分守矣寇據郭外民居不知所以攻但發礮擊城礮丸及城中街有賣漿者方食而碎其盃城中大震或議發城上大礮擊之或曰無礮臺必驚崩塌垣不可輕也寇至之日城中兵勇八千餘統將數百名隸巡撫巡

撫不敢言節度諸生及舉貢各自請領百人或二十人
佐巡塚口多詣羅繞典言事布政使恆福內召潘鐸代
之未至署司道周顓張其仁等莫敢與兵餉大議惟善
化知縣王葆生頗好言兵諸大吏將帥亦莫之問也鮑
起豹居城南樓迎城隍神大像與對坐張亮基已至甯
鄉界聞警還屯常德集兵八月壬午鄧紹良將楚雄兵
九百入屯南城始發礮擊外寇潘鐸至步巡城中令居
民商賈各安業無恐城中被圍七日亦稍自定 詔奪
塞尙阿程喬采官以徐廣縉并代之促向榮赴援向榮
自四月初稱疾居桂林塞尙阿深劾之罪至遣戍榮終

不起聞塞尙阿罷乃疾行癸巳至丁酉張亮基至己亥
駱秉章解任留居城中庚子郴寇悉趣長沙益募礦夫
穴城根九月丙辰塞尙阿至諸援師大集近五萬矣向
榮不樂居城中以寇渡湘亦率所部渡湘爲屯時獨搏
戰不利諸軍相視莫往城南戰事主於和春屯白沙井
自以扞遏爲功而江忠源以偏師與合屯或以爲忠源
之謀然寇與官軍均踰伏屯內屯外一里行人來往自
如入城者唯避南門其餘六門皆可繼以出入衢巷間
婦女娛遊酒食過從盛於平時忘其爲圍城焉丙子南
城地雷轟發城柵四丈鄧紹良部軍方集天妃祠攤錢

博戲紹良獨拔刀當城缺斫先登一人者顛部軍聞之
皆棄錢奔城缺寇不敢上練丁輦木石塞缺口城守復
定十月己卯地雷再發不及城垣甲午地雷發城崩八
丈瞿騰龍拒缺口寇復退走於是徐廣縉方止湘潭議
者以爲合兵腹背擊寇可殲也而巡撫羣官以爲塞尙
阿在城中廣縉不宜來逼之其前軍將福興寔來乙未
夜半寇渡湘西走丙申城上訶寇屯疑空虛有呼者曰
賊去矣將帥聞報皆愕且懼無敢言賀而僚吏士民相
慶論功不復問寇所往張亮基奏請防湘潭徐廣縉以
爲寇走甯鄉遣兵南防湘鄉故寇收罷眾從容以去或